

四庫全書

史部

欽定四庫全書

元和郡縣志卷十二

唐 李吉甫 撰

河南道 七

曹州 濟陰上

開元戶七萬三千一百六十一 鄉一百四十九
案元和戶鄉數傳寫缺

禹貢豫州之域于周又為曹國之地後屬于宋左傳哀
公八年宋景公滅曹按曹國在州東北三十七里濟陰

縣界故定陶城是也七國時屬齊宋為楚魏所滅三分其地齊得其濟陰東平漢為濟陰郡之地在濟水之南故以為名漢景帝中六年別為濟陰國宣帝甘露二年更名定陶哀帝更為濟陰郡屬兗州後魏于定陶城置西兗州周武帝改西兗州為曹州取曹國為名也隋大業三年改為濟陰郡隋亂陷賊武德四年平孟海公復為曹州

州境

東西二百五十九里
南北二百五十九里

八到

西至上都一千五百二十五里
西至東都六百六十五里

東至兗州三百七十里

東南至宋州一百五十里

西南至汴州一百四十五里

西北至滑州二百里

東北至鄆州三百三十里

貢賦

開元貢賦

蛇牀子
綿絹

蓂莢

管縣六

濟陰
冤句
乘氏
成武
南華
考城

濟陰縣

緊郭下

本漢定陶縣之地屬濟陰郡隋開皇六年于此置濟陰縣屬曹州皇朝因之

曹南山在縣東二十里詩所謂薈兮蔚兮南山朝濟是也

汜水在縣南昔漢高祖既定天下即位于汜水之陽張晏曰汜水在濟陰界取其汎受弘大而潤下按今汜水縣東亦有高祖即位壇據叔孫通傳云高祖為皇帝通于定陶就其儀在濟陰是也

荷澤在縣東北九十里故定陶城東北其地有荷山故名其澤為荷澤禹貢曰導荷澤被孟豬

州理中城蓋古之陶丘也一名左城帝王世紀舜陶于河濱即禹貢之陶丘今濟陰定陶西有陶丘是也爾雅曰再成為陶丘成猶重也

古曹國在縣東北四十七里故定陶是也定陶故城堯所居也堯先居唐後居陶故曰陶唐氏史記曰曹叔振鐸者周武王弟封于曹魯哀公八年宋滅曹執曹伯陽

自曹叔至伯陽凡十八葉又范蠡相越平吳後變姓名為朱公居于陶號陶朱公亦此地也

莘仲故城在縣東南三十里蓋古之莘國也伊尹耕于莘野湯聞其賢聘以為相即此地

三駸亭古國也在縣東北四十九里湯伐桀遂伐三駸俘厥寶玉注曰三駸國名今定陶是也

冤句縣

縣東至州四十七里

本漢舊縣也漢初屬梁國景帝時屬濟陰郡隋開皇三

年罷郡以縣屬曹州

煮棗故城在縣西北四十里漢書樊噲攻煮棗屠之是也

濟陽故城在縣西南五十里漢濟陽縣也光武以建平元年生于濟陽縣明照一室是歲有嘉禾生一莖九穗大子凡禾因名秀光武皇考為濟陽令

袁本初故城在縣北七十里袁紹所築

乘氏縣

緊南至州五十四里

本漢舊縣也屬濟陰郡隋開皇三年罷郡以縣屬曹州
大業末年廢武德四年重置

孟海公南北二城在縣東四十五里隋末賊帥孟海公
所築

成武縣

聚西至州一百里

本漢舊縣也屬山陽郡後漢改屬濟陰郡隋于此置戴
州成武縣屬焉大業二年省戴州縣移理州城中後屬
曹州武德五年于金鄉縣重置戴州縣又屬焉貞觀十

七年廢戴州縣又屬曹州

故秬城在縣西北二十九里昭帝封金日磾為秬侯

南華縣

上東南至州一百二十里

本漢離狐縣也屬東郡舊傳初置縣在濮水南常為神狐所穿穴遂移城濮水北故曰離狐後漢屬濟陰郡魏志李典從太祖遷離狐太守然則魏時離狐郡也晉屬濟陰郡隋開皇三年罷郡縣屬曹州天寶元年改曰南華英公李勣左僕射彭城郡公劉晏皆此縣人

濮水在縣南五里昔殷紂使師延作靡靡之樂武王伐紂師延至投濮水而死謂此水也

考城縣

聚東北至州九十五里

古戴國也春秋隱公十年宋人蔡人衛人伐戴後屬宋

楚滅宋改名曰穀漢以為菑縣國都城記曰

柔國都城記見史

堯本紀注是徐才宗所撰而隋書經籍志但云二卷不著撰人姓名今附識于此

縣西南有戴

水今名戴陂周迴可百餘里蓋本戴國取此陂水為名也漢之興也其邑多菑年數不登故邑曰菑章帝柴于

岱宗過菑縣詔御史曰陳留菑縣其稱不令故高祖鄣
柏人之名武帝休聞喜而顯獲嘉其改菑縣為考城縣
至晉屬濟陰郡高齊天保七年省考城縣移成安縣理
此隋開皇十六年仍改名考城縣屬宋州武德五年改
屬曹州

葵丘在縣東南一百五十步左傳齊桓公會諸侯于葵
丘是也

大劑陂即戴陂也在縣西南四十五里周迴八十七里

與宋州襄邑縣中分為界

濮州

濮陽上

開元戶四萬六千九百二十一
案元和戶鄉數傳寫缺

鄉九百十三

禹貢兗州之域春秋時為衛國地左傳齊桓公會諸侯
于鄆注曰鄆衛地今東郡鄆城縣也戰國時屬齊在漢
為濟陰郡之鄆城也後漢獻帝于此置兗州晉置濮陽
郡後改濮陽國封王子允為王後為郡隋開皇十六年
于此置濮州大業三年廢濮州入東平郡隋末陷于寇

賊武德四年討平王世充于此重置濮州

州境

東西二百三十五里
南北一百三十五里

八到

西南至上都一千六百五十五里
西南至東都七百九十五里

西南至滑州二百一十五里
南至曹州二百一十里

北至黃河二十里
東北至鄆州一百七十里

貢賦

開元貢
賦
絹二十疋
綿
絹
綿

管縣五

鄆城 雷澤 臨濮 濮陽 范

鄆城縣 聚郭下

本漢舊縣屬濟陰郡隋開皇十六年于此置濮州鄆城縣屬焉大業三年廢濮州縣屬東平郡武德四年重置濮州鄆城縣又隸焉

黃河北去縣二十一里

州理城在故鄆城中魏文帝以臨淄侯植為鄆城侯

雷澤縣

上西北至州九十里

本漢郕陽縣古郕伯國周武王封弟季戴于郕漢以為

縣屬濟陰郡隋開皇六年于此置雷澤縣因縣北雷夏澤為名也屬濮州

歷山在縣西北十六里史記曰舜耕歷山耕者讓畔
灘水沮水二源俱出縣西北平地去縣十四里

雷夏澤在縣北郭外灘沮二水會同此澤

姚墟在縣東十三里舜生于姚墟

堯母廟在縣西南四里

堯陵在縣西三里自堯即位至永嘉三年凡二千七百

二十一年記于碑貞觀十一年有詔禁人芻牧春秋奠
酌

臨濮縣

上北至州六十里

本漢成陽縣地屬濟陰郡隋開皇十六年分鄆城南界
雷澤西界置臨濮縣屬濮州南臨濮水故以為名大業
二年廢武德四年重置

清丘在縣西三十五里

濮陽縣

上東至州八十里

本漢舊縣也古昆吾國即帝丘顓頊之墟也昆吾即夏諸侯為五伯之首左傳曰狄滅衛遷于帝丘衛侯自楚丘徙濮陽縣秦置東郡理此漢仍為東郡及濮陽縣也隋開皇十六年改屬濮州

黃河北去縣十五里

瓠子河上承黃河漢書武帝時河決瓠子東南注鉅野通于淮泗上使汲黯鄭當時興人徒塞之堤復壞是時武安侯田蚡奉邑食鄒在河北河決而南則鄒無水災

乃言江河之決乃天事也非易以人力塞之乃不復塞
後二十餘歲歲比不登梁楚尤甚上使汲人郭昌率卒
數萬人塞瓠子決河沈白馬圭壁自將軍以下皆負薪
下淇園之竹以為楗上悼功之不成乃作歌于是卒塞
瓠子築宮于其上名曰宣房其後王尊為東郡太守河
水盛溢泛浸瓠子金堤尊躬率吏民沈白馬祀水神親
執圭璧使巫策祝請以身填金堤水盛堤壞吏民皆奔
走尊立不動而水漸退

范縣

上西南至州六十里

本漢舊縣屬東郡春秋時晉大夫士會之邑也高齊廢
隋開皇六年又置范縣屬濟州十六年改屬濮州

故顧城在縣東二十八里夏之顧國也詩曰韋顧既伐
昆吾夏桀注曰三國黨于桀皆為湯所誅

密州

高密中

禹貢青州之域兼得徐州之地今州界于春秋之時為
莒魯之地戰國時屬齊秦并天下屬琅琊郡漢文帝十

六年分齊立膠西國都高密宣帝更名高密國後魏永安二年分青州立膠州取膠水為名也隋開皇五年改膠州為密州取境之密水為名也隋亂陷賊武德五年山東底定改置密州

州境

東西三百一十六里
南北三百九十里

八到

西至上都二千七百四十五里
西至東都一千八百八十五里

東至大海一百六十里

南至海州三百八十四里

西南至沂州三百七十里

西北至青州三百三十里

東北至萊州三百四十五里

貢賦

開元貢賦

細布
純布

牛黃

海蛤

管縣四

諸城 高密 輔唐 莒

諸城縣

上郭下

本漢東武縣也屬琅琊郡樂府章所謂東武吟者也後漢屬琅琊國晉屬東莞郡後魏屬高密郡隋開皇十八年改東武為諸城縣取縣西三十里漢故諸縣城為名

琅琊山在縣東南百四十里史記曰始皇二十六年滅齊遂登琅琊作層臺于山上謂之琅琊臺週迴二十里秦王樂之因留三月徙黔首二萬戶于山下後十二年刊石立碑紀秦功德

海在縣東一百五十里

廬水出縣東南廬山水側有勝火木野火燒死其炭不灰故東方朔有謂不灰之木者也

縣理東南百三十里濱海有鹵澤九所煮鹽今古多收

其利

澮水故堰在縣東北四十六里蓄以為塘方二十餘里

溉水田萬頃

高密縣

上西南至州一百二十里

本漢舊縣也文帝十六年分齊立膠西國封齊悼惠王子卬為膠西王都高密世祖封鄧禹為高密侯高齊文宣帝省高密縣隋開皇中復置屬密州

海在縣東南六十里

澠水在縣西南自諸城縣界流入去縣四十里昔韓信與楚將龍且夾澠水而陣信為萬餘囊盛沙壅水上流引軍擊龍且陽不勝還走龍且追信信決壅囊水大至龍且軍大半不得渡遂斬龍且

膠水在縣東三十里

夷安澤在縣北二十里周迴四十里多麋鹿蒲葦

龍且城在縣西南五十五里楚將龍且所築也

鄭玄墓在縣西七十里

輔唐縣

上東南至州一百二十里

本漢安丘縣也屬北海郡後漢屬北海國有渠丘亭故
莒渠丘公所居也高齊文宣帝天保七年省隋分昌安
縣置牟山縣大業二年改牟山縣為安丘縣取漢書舊
名也屬密州乾元二年改為輔唐縣

牟山在縣西南十三里牟山縣取名于此

浯水堰三齊記曰昔者堰浯水南入荆水灌田數萬頃
今尚有餘堰而稻田畦畛存焉

莒縣


上東北至州一百九十里

故莒子國也漢為莒縣文帝二年封朱虛侯章為城陽王都莒後魏亦以莒縣屬東莞郡隋開皇三年廢郡莒縣屬莒州大業三年罷莒州以莒縣屬琅琊郡武德五年重置莒州縣屬焉貞觀八年廢莒州以縣屬密州
濰山在縣東北八十三里濰水所出也

縣理在莒國故城中城三里竝皆崇峻惟南開一門
子城方十二里郭周迴四十里

故曹公城在縣南七十二里昔魏太祖征陶謙拔五城略地東海于此築城周迴四里

漢海曲縣在縣東一百六十里屬琅琊郡有鹽官地有東呂鄉東呂里太公望所出也王莽末海曲縣有呂母者其子為縣令枉殺乃散財以招少年少年感母恩問母所欲具言之乃共起兵殺縣令其後屯結至數萬赤眉之興由此始也今東海縣有呂母國即舊集之所也



元和郡縣志卷十二

欽定四庫全書

史部

元和郡縣志卷十三至十五

詳校官編修臣曹 誠

檢討臣 德生覆勘

總校官庶吉士臣 倉聖脉

校對官中書臣 范來宗

謄錄監生臣 任鑑

欽定四庫全書

元和郡縣志卷十三

唐 李吉甫 撰

河南道 八

海州 東海上

開元戶二萬三千七百二十八 鄉四十
元和戶鄉數傳寫缺

禹貢徐州之域春秋時魯國之東鄙七國時屬楚秦置
三十六郡以魯為薛郡後分薛郡為郯郡漢改郯為東

海郡領三十七縣理在郟縣屬徐州後漢以為東海國
封皇子疆為王晉惠帝封高密王子越為東海王梁武
帝末年長江以北悉附後魏武定七年改青冀二州為
海州高齊文宣帝移海州理琅琊郡改琅琊郡為朐山
郡隋末喪亂臧君相竊據之武德四年君相以郡歸順
改為海州

州境

東西一百九十八里
案南北里數傳寫缺

八到

西至上都取沂兗路二千五百五里
西至東都一千六百四十里

東南至楚州四百一十里
南至揚州七百里

東南至泗州連水縣取官河水路三百四十里陸路二百五十里

西北至沂州三百三十里
西至徐州取下邳路五百六十里

北至密州三百八十四里
東至海二十里

貢賦
開元貢
楚布
綿
絹

管縣四

朐山 東海 沭陽 懷仁

朐山縣
工郭下

本漢朐縣也屬東海郡後周武帝建德六年改朐山縣為朐山郡取界內朐山為名也隋開皇三年廢郡縣屬海州

羽山在縣西北一百里書曰殛鯀于羽山即此也

碩獲湖在縣南一百四十二里

龍且故城在縣南六十里

鍾離昧故城在縣南百里項羽將鍾離昧所築昧即此

縣人

東海縣

上西至州水路九十里

本漢贛榆縣地俗謂之鬱州亦謂之田橫島宋明帝失
淮北地乃于鬱州上僞立青州地後入魏魏改青州為
海州又于此置臨海鎮高齊廢臨海鎮周武帝後置東
海縣後遂因之

小高山在縣北六十里田橫弟避漢所居之山也其山
三面絕壁皆百餘仞惟東面一道劣容行人
大海在縣東二十八里

贛榆故城在縣北四十九里隋末土人臧君相築

田橫國在縣北五十七里齊王田廣既死田橫乃代立
為王與灌嬰戰于贏下橫敗走與其屬五百人入居海
島即此也

沭陽縣 中東北至州一百六十里

本漢厚丘縣地宋文帝元嘉四年于此置縣屬南彭城
郡至太清二年地入魏孝靜帝改為沭陽郡在沭水之
陽故以為名仍于郡東置懷文縣周武帝改懷文縣為

沭陽縣

沭水西自下邳縣界流入經縣南十步

碩葭湖在縣東八十里與朐山連水三分湖為界

懷仁縣

中東南至州九十里

本漢贛榆縣地梁于此置北海郡後魏改置義唐郡隋開皇初廢郡移懷仁縣理于此改屬海州

贛榆故城一名鹽倉城在縣東北三十里漢舊縣也屬

琅瑯郡

沂州琅琊中

卷十三

開元戶二萬七千四百
鄉五十五
衆元和戶鄉數傳寫缺

禹貢徐州之域春秋時為齊地秦并天下置琅琊郡因琅琊山以為名也漢因之高后立營陵侯劉澤為琅琊王文帝元年徙澤為燕王以琅琊為郡晉武帝咸寧二年改封東海王睿為王王即帝位于江東是為東晉元帝元帝于郡城置發千戍以南軍鎮之自永嘉之後琅琊陷于胡寇成帝于丹陽江乘縣界別立南琅琊郡至

宋武得河南尋又沒于後魏莊帝置北徐州琅瑯郡屬焉周武帝改北徐州置沂州以州城東臨沂水因以名之隋大業十三年亂離郡為徐圓朗所破武德四年討

平圓朗復置沂州

州境

東三百二十一里
西三百二十一里
南四百二十九里
北四百二十九里

八到

西至上都二千二百七十五里
西至東都一千四百一十五里

東南至海州二百三十里

西至兗州三百八十里

東南至泗州下邳縣二百七十七里
北至青州四百五十里

西至徐州三百五十里
東至密州三百七十里

西北至濰州五百三十里

貢賦

開元貢

紫石英
綿絹

黃銀

管縣五

臨沂 沂水 費

承

新泰

臨沂縣

上郭下

本漢舊縣也屬東海郡東臨沂水故名之後漢改屬琅
琊國晉屬琅琊郡高齊省隋開皇末復置屬沂州

羽山在縣東南一百一十里與海州朐山縣分界

沂水東去縣一里

王僧辯城在縣東北五十里梁將王僧辯屯兵于此

王導故宅在縣東北四十八里

沂水縣 上南至州二百里

本漢東莞縣即春秋莒魯所爭之鄆邑也城陽姑幕縣南有員亭即鄆也俗變其字耳後魏孝文帝于此置新泰縣隋開皇四年改為東安縣十六年又于古蓋城別

置東安縣而此改名沂水縣

沂山在縣北一百二十四里周禮青州其鎮沂山

穆陵山在縣北一百九十里管仲曰賜我先君履南至
于穆陵是也

大峴山在縣北九十里宋高祖北伐慕容超大將公孫
五樓說起曰吳兵輕銳難與爭鋒宜斷大峴使不得入
上策也起曰引使過峴我以鐵騎蹙之此成擒耳不從
宋高祖兵遂得入初是役也或曰彼若嚴守大峴軍無

所資何能自返高祖曰鮮卑性貪且愛其穀必將引我
兵一入大峴吾何患焉及師過大峴高祖喜曰天贊我
也遂大破之伍緝之從征記曰大峴去半城八十里直
度山二十五里崖坂峭曲石徑幽危四岳三塗不是過
也

靄山在縣西北二十八里出紫石英好者表裏映徹形
若靄狀故名靄山今猶入貢

成平公營在縣北百五十六里周武帝拔鄴城齊王高

緯先送其母妻于青州是日緯率千騎走青州周遣大將軍成平公尉遲勤率二千騎追之擒緯于青州南之雙溝周因授以青州總管立碑紀功

費縣 上東南至州九十里

古費國也隱公元年傳曰費伯帥師城郎後為魯季氏之邑至漢為費縣屬東海郡自宋至隋皆屬琅琊郡大業末為賊潘當所破武德四年重置屬沂州
蒙山在縣西北八十里楚老萊子所耕之處

東蒙山在縣西北七十五里論語曰夫顓臾昔者先王
以為東蒙主

南城縣城在縣南九十里史記齊威王使檀子守南城
則楚人不敢為寇是也

承縣 上東北至州一百八十五里

本漢之承縣春秋時鄆國也屬東海郡隋開皇三年罷
郡承縣屬徐州大業十三年縣為山賊左君衡所破武
德四年又于此置鄆州又改蘭陵縣為承縣貞觀八年

廢鄆州縣屬沂州縣西北有承水因以名焉

抱犢山在縣北六十里壁立千仞頂寬而有水此山去海三百餘里天氣澄明宛然在目昔有遁隱者抱一犢于其上墾種故以為名山高九里周迴四十五里

蘭陵縣城在縣東六十里史記曰荀卿以儒者適楚楚春申君以為蘭陵令因家焉

縣界有陂十三所竝貞觀元年以來修立以溉田焉

新泰縣

上東南至州二百六十三里

春秋時魯平陽邑也宣公八年城平陽晉武帝泰始中
鎮南將軍羊祜此縣人也表改為新泰縣屬泰山郡隋
開皇四年屬莒州大業二年廢莒州以縣屬沂州

蒙山在縣東南八十八里書曰蒙羽其藝

障山在縣東八十里出銷石石腦炬火等石居人常採
為貨

萊州 東萊下

開元戶二萬三千一百五 鄉四十三
案元和戶鄉數傳寫缺

禹貢青州之域即古萊子國也齊滅之遷萊子于郕在齊國之東故曰東萊漢高帝四年韓信虜齊王廣分齊郡置東萊郡領縣十七理掖縣屬青州後魏獻文帝分青州置光州取界內光水為名隋開皇二年改光州為萊州隋末陷賊武德四年討平綦順復為萊州

州境

東西四百二十八里
南北二百四十一里

八到

西南至上都二千七百六十里
西南至東都一千九百里

東北至登州二百四十里
正南微西至密州三百四十五里

北至大海五十里
西南至青州三百四十五里

貢賦

開元貢
黃銀
文蛤
牛黃
滑石
器
賦
絹
綿
布
賫布

管縣四

掖
即墨
昌陽
膠水

掖縣

上郭下

本漢舊縣也屬東萊郡按掖水出縣南三十五里寒同
山故縣取為名隋開皇三年罷郡屬萊州

萬里沙在縣東北三十里郊祀志武帝元封元年大旱

禱萬里沙

浮游島在縣西北四十里遙望島在海中若浮游然故

名

海水在縣北五十二里

膠水西去縣七十五里

海神祠在縣西北十七里

即墨縣

中西北至州二百六十三里

本漢舊縣屬膠東國城臨墨水故曰即墨高齊文宣帝

併入膠水縣隋開皇末又于此置即墨縣屬萊州

大勞山小勞山在縣東南三十八里晏謨齊記曰太白
自言高不如東海勞昔鄭康成領徒于此

壯武故城在縣西六十里晉封張華為壯武侯

海在縣東四十三里又在縣南百里

昌陽縣 上西北至州一百九十九里

本漢舊縣也屬東萊郡置在昌水之陽故名昌陽有鹽
官隋開皇三年罷郡昌陽縣屬萊州

黃銀坑在縣東百四十里隋開皇十八年年州刺史辛公義于此坑冶鑄得黃銀獻之大業末貞觀初更沙汰得之

奚養澤在縣西北四十里周禮職方氏幽州其澤數曰奚養

膠水縣

中北至州一百里

本漢膠東國之地後漢省膠東國為膠東縣屬北海國後魏屬北海郡隋開皇三年罷郡屬萊州仁壽元年改

為膠水縣

即墨故城在縣東南六十里古東齊之地史記蘇秦曰齊東有琅瑯即墨之饒此其處也齊湣王時燕將樂毅伐齊下七十餘城惟莒即墨不下田單設奇策破燕軍迎襄王于莒盡復齊地封單為安平君漢書曰漢元年項羽徙齊王田市于即墨為膠東王田榮怒殺田市即墨自立為王遂併三齊之地漢膠東郡領八縣理即墨即此城也

平度故城在縣西北六十七里城西北有土山古今煮鹽處

淄州 淄川上

開元戶三萬七千四百四
鄉七十一
案元和戶鄉數傳寫缺

禹貢青州之域周之九州為幽州之境職方氏幽州其浸菑時州蓋取淄水為名也春秋及戰國時屬齊秦為齊郡之地在漢為濟陰郡之般陽縣也隋開皇十六年于今理改置淄州隋亂陷賊武德元年重置淄州

州境

東一百一十五里
西一百一十二里
南一百一十二里
北一百一十二里

八到

西南至上都二千二百九十五里
西南至東都一千四百三十五里
東至青州一百二十里
西北至兗州三百七十里

北渡河至棣州二百一十里
東南至沂州五百三十里

貢賦

開元
賦貢
防風
綿絹
理石
木粟

管縣五

淄川
長山
鄒平
濟陽
高苑

淄川縣

上郭下

本漢般陽縣也屬濟南在般水之陽故名後漢屬齊國
晉省宋于此置貝丘縣隋開皇十八年改貝丘為淄川
縣屬淄州

淄水出縣理東南原山去縣六十里俗傳禹治水功畢
土石黑數里之中波流若漆故謂之淄水

長山縣

上東南至州六十四里

本漢於陵縣地也宋武帝于此立武強縣隋開皇十八
年改武強為長山縣取長白山為名屬淄州武德元年

置鄒州縣又屬焉八年廢鄒州依舊屬淄州

長白山在縣西南四十里

濟水西北去縣三十五里

鄒平縣

上東南至州一百一十里

本漢舊縣也屬濟南郡隋開皇三年自梁鄒城移平原縣入鄒平城屬齊州今理是也十六年改屬淄州十八年改平原縣為鄒平縣復舊名也

黃河西北去縣八十里

濟水南去縣三十五里

濟陽縣

上東南至州九十四里

本漢梁鄒縣也屬濟南郡隋又于後漢梁鄒城地置濟南縣大業二年省景龍元年于漢梁鄒城置濟陽縣屬

淄州

八會津在縣南一里相傳水陸所湊其路有八故名

濟水在縣南又東北入高苑縣界

高苑縣

上南至州一百一十里

本漢舊縣也屬千乘國後漢屬樂安國宋于此置長樂縣屬渤海郡十八年改為會城縣隋大業三年改為高苑縣取縣東南高苑故城為名隋末陷賊武德元年重置高苑縣屬鄒州八年廢鄒州縣屬淄州
濟水北去縣七十步

千乘故城在縣北二十五里漢千乘國也

登州 東年中府

開元戶二萬八千五百三十三 鄉三十六
案元和戶鄉數傳寫缺

禹貢青州之域古萊子之國春秋齊侯滅萊至漢為東萊郡之地後魏孝靜帝分東萊于黃縣東一百步中郎故城置東牟郡高齊廢隋開皇三年改置牟州大業三年廢武德初又置因文登縣人不從賊黨遂于縣理置

登州

州境

東西五百六十里
南北一百六十五里

八到

西南至上都三千里
西南至東都二千一百四十里

東至文登縣界大海四百九十里
東南至大海四百六十里

南至大海六十里
南至萊州昌陽縣二百里

西至海四里當中國往新羅渤海過大路
北至海三里

正北微東至大海北岸都里鎮五百二十里

貢賦

開元貢

賦

牛黃

布麻

水蔥席

管縣四

蓬萊 牟平 文登 黃

蓬萊縣

中郭下

本漢黃縣之地屬東萊郡昔漢武帝于此望蓬萊山因

築城以蓬萊為名在黃縣東北五十里貞觀八年于此置蓬萊鎮神龍三年析黃縣置蓬萊縣在鎮南一里即今登州所理是也

牟平縣

中西至州二百里

本漢縣也屬東萊郡有鐵官鹽官在牟山之陽其地夷坦故曰牟平漢書齊悼惠王子將闔為牟平侯後屬萊州武德四年于中郎城置牟州牟平縣屬焉貞觀元年牟州及縣俱廢麟德二年析文登縣于此重置牟平縣

屬登州

文登縣

上西北至州一百二十五里

本漢牟平縣也屬東萊郡高齊後帝分牟平置文登縣屬長廣郡取縣界文登山為名隋開皇三年廢長廣郡文登縣屬萊州武德元年改屬登州

之罘山在縣西北一百九十里史記曰秦始皇二十九年登之罘刊石紀功封禪書曰齊有八祠之罘為陽主即此

成山在縣東北百八十里史記曰始皇二十九年又東遊登成山升之罘勒石紀功郊祀志曰齊有八祠成山為日主封禪書曰七日日主祠成山

文登山在縣西北九十里

海在縣南六十里縣東一百八十里三面俱至于海縣東北海中有秦始皇石橋今海中時見有堅石似柱之狀

東牟故城在縣西北一百十里漢高后二年封齊悼惠

王子興居為侯

不夜故城在縣東北八十五里屬東萊郡春秋時萊子所置初築此城有日夜出故名之

黃縣

中東北至州九十里

本漢舊縣也屬東萊郡隋開皇三年罷郡屬萊州武德四年屬牟州神龍三年置登州黃縣割屬焉漢書曰秦欲攻匈奴運糧使天下飛芻輓粟起于黃腫琅瑯負海之郡轉輸北河率三十鍾面致一石

黃即今黃縣腫即今文登縣屬東萊

郡腫直瑞反北河朔方以北六斛四斗曰鍾
計道路所費凡百九十二斛乃致米一石

萊山在縣東南二十里封禪書曰齊之八祠六曰月主
祠之萊山

故黃城在縣東南二十五里古萊子之國春秋傳曰齊
侯滅萊杜注曰今萊黃縣是也

大人故城在縣北二十里司馬宣王伐遼東造此城運
糧船從此入今新羅百濟往還常由于此

蓬萊鎮在縣東北五十里

海濱祠在縣北二十四里大人城上

元和郡縣志卷十三

欽定四庫全書

元和郡縣志卷十四

唐 李吉甫 撰

河東道 一

河中府 河東赤

開元戶七萬二百七
元和戶一萬九千六百 系鄉數傳寫缺

今為河中節度使理所 管河中府絳州晉州慈州
隰州管縣三十七都

管戶四萬一千三百六十五

禹貢冀州之域按今州本帝舜所都蒲坂也春秋時為
魏耿楊芮之地左傳曰晉獻公滅魏以賜畢萬服虔注
曰魏在晉之蒲坂畢萬之後十代至文公列為諸侯至
惠王僭號稱王至王假為秦所滅今州即秦河東郡地
也漢元年項羽封魏豹為西魏王王河東都平陽二年
豹降從漢王在滎陽請歸侍親疾至則絕河津反為楚
盡有太原上黨地九月韓信虜豹定魏地置河東上黨
太原郡文帝時季布為河東守文帝謂曰河東吾股肱

郡故特召君耳後魏太武帝于今州理置雍州延和元年改雍州為秦州周明帝改秦州為蒲州因蒲坂以為名隋大業三年罷州又置河東郡隋將屈突通守河東高祖師次桑泉縣通出守潼關乃令鷹揚郎將堯君素王行本留鎮郡城遂于今桑泉縣置河東郡武德元年罷郡置蒲州其年堯君素為賊人薛宋李楚客所殺王行本仍堅守不賓二年置蒲州總管三年行本歸化自桑泉移蒲州于今理九年廢總管置都督府復為州開

元元年五月改為河中府仍置中都麗正殿學士韓覃
上疏陳其不可至六月詔停復為州乾元三年又改為
河中府大歷中元載為相又上建中都議曰自古建大
功者未嘗不用天因地故高祖保關中光武據河內皆
深根固本以制天下臣等攷天地之心本聖人之意驗
古往之事切當今之務則莫若建河中為中都隸陝虢
晉絳汾潞儀石慈隰等十城為藩衛長安去中都三百
里順流而東邑居相望有羊腸底柱之險

羊腸在潞州
壺關縣東南

一百里濁河孟門之限

孟門在慈州文城縣西南三十六里即龍門上口

以輳轅

為襟帶與關中為表裏劉敬所謂扼天下之吭而撫其背即此之謂推是而言則建中都將欲固長安非欲外之也將欲安成周非欲捨之也將欲制蠻夷非欲懼之也將欲定天下非欲弱之也河中之地左右王都黃河北來太華南倚總水陸之形勝鬱關河之氣色每歲白露既降涼風已高陸下處金城湯池內綏華夏登信臣驍將外馭戎狄出于仲秋還于農隙有漕濁泛舟之便

無登高履險之虞不傷財不害人得養威而時狩如此則國有保安之所家無係虜之憂矣疏奏不省初代宗自幸陝之後每歲八九月間京師恟恟常懼犬戎復至將相之家皆聚儲糗為行李之備載知人情不安遂獻此疏冀因制置竊有兵權議亦宏博盡當時利害然代宗探見載意議故不行或曰建中都江融設險圖之首篇也融誅後書已不傳不知斯言何自而得

府境

東西二百五里
南北一百七十七里

八到

西南至上都三百二十里
東至東都五百八十五里

東南至陝州二百四十五里
東南至虢州一百八十三里

西至同州六十七里

西南至華州一百四十七里

東北至絳州取桐鄉路二百六十里

貢賦

開元貢

麥麴扇 竹扇 漆匣
鳳栖梨 乾棗 龍骨

賦

綿 絹 布 麻

管縣八

河東 河西 臨晉 猗氏 虞鄉 寶鼎

解 永樂

河東縣

次赤郭下

本漢蒲坂縣地也屬河東郡隋開皇三年罷郡縣仍屬蒲州十六年移蒲坂縣于城東仍于今理別置河東縣大業二年省蒲坂縣入河東縣

雷首山一名中條山在縣南十五里

風陵堆山在縣南五十五里與潼關相對

長原一名蒲坂在縣東二里其原出龍骨

河水北自桑泉縣界流入

媯汭水源出縣南雷首山尚書曰釐降二女于媯汭
州城即蒲坂城也城中有舜廟城外有舜宅及二妃壇
故陶城在縣北四十里尚書大傳曰舜陶于河濱

故堯城在縣南二十八里

蒲坂關一名蒲津關在縣西四里魏志曰太祖西征馬
超韓遂夜渡蒲津關即謂此也今造舟為梁其制甚盛
每歲徵竹索價謂之橋腳錢數至二萬亦關河之巨防

焉

風陵故關一名風陵津在縣南五十里魏太祖西征韓遂自潼關北渡即其處也

舜祠在州理舜城中貞觀十一年詔致祭以時灑掃

伯夷墓在縣南三十五里雷首山南貞觀十一年詔致

祭禁樵蘇

河西縣

次赤郭下

本朝邑縣東地乾元三年因置河中府割朝邑縣置

臨晉縣

水畿西南至府七十四里

本漢舊縣地也後魏改為北解縣隋開皇十六年分猗氏縣于今理置桑泉縣因縣東桑泉故城以為名也天寶十二年改為臨晉

河水經縣西四十里

涑水在縣東二十三里

故解城本春秋時解梁城又為漢解縣城也在縣東南十八里晉惠公許賂秦伯以河外列城五東盡虢略內

及解梁城是也

桑泉故城在縣東十三里左傳曰重耳圍令狐入桑泉謂此也

故司空魏國公裴寂墓在縣東北十七里

猗氏縣

次畿西南至府一百一十里

本漢舊縣即猗頓之所居也東魏恭帝二年改猗氏為桑泉縣周明帝復改桑泉為猗氏縣屬汾陰郡隋開皇三年罷郡屬蒲州

涑水經縣南六里

故郇邑在縣西南四里左傳曰晉侯謀去故絳欲居郇
瑕氏之地韓獻子曰郇瑕氏土薄水淺不如新田遂遷
新田即平陽絳邑縣也

虞鄉縣

水經西至府七十里

本漢解縣地也後魏孝文帝改置南解縣屬河東郡周
明帝武成二年廢南解縣別置綏化縣武帝改綏化為
虞鄉

檀道山一名百梯山在縣西南十二里山高萬仞躋攀者百梯方可升降故曰百梯山南有穴莫測深淺每有敕使投金龍于此兼醮焉

王官故城在縣南二里左傳曰秦伯涉河焚舟取王官

案後開喜縣王官故城在縣南十五里以虞鄉在開喜西南言之王官故城當在虞鄉縣東北云在縣南二里誤有

五老仙人祠在縣西十里

寶鼎縣

次畿南至府一百一十里

本漢汾陰縣也屬河東郡劉元海時廢汾陰縣入蒲坂縣後魏孝文帝復置汾陰縣開元十一年改寶鼎縣

黃河在縣北十一里趙簡子沈佞臣樂激之所也

案樂激

呂氏春秋及水經注並作樂微

汾水北去縣二十五里

后土祠在縣西北一十一里

殷湯陵在縣北四十三里

解縣次畿西北至府四十五里

本漢舊縣也屬河東郡隋大業二年省解縣九年自綏
化故城移虞鄉縣于廢解縣理即今縣理是也武德元
年改虞鄉縣為解縣屬虞州因漢舊名也仍于蒲州界
別置虞鄉縣貞觀十七年廢虞州解縣屬河中府

中條山在縣南二十里

鹽池在縣東十里

女鹽池在縣西北三里東西二十五里南北二十里鹽
味少苦不及縣東大池鹽俗言此池亢旱鹽即凝結如

逢霖雨鹽則不生今大池與安邑縣池總謂之雨池官置使以領之每歲收利納一百六十萬貫

熨斗陂在縣東北二十五里

通路自縣東南踰中條山出白陘趨陝州之道也山嶺參天左右壁立間不容軌謂之石門路出其中名之白陘嶺焉

永樂縣 次畿北至府九十里

本漢河北縣地周明帝改河北縣為永樂縣武帝省永

樂縣以地屬芮城縣武德二年分芮城于縣東北二里
永固堡重置永樂屬芮州七年移于今理貞觀八年改
屬河中府

中條山在縣北三十里

河水經縣南二里

永樂澗水源出中條山經縣東二里又南入河

五老山在縣東北十三里堯升首山觀河渚有五老人
飛為流星上入昴因號其山為五老山

絳州 絳郡 雄

開元戶八萬一千九百八十八
元和戶一萬一千二百七十一

鄉一百七十六
案鄉數傳寫缺

禹貢冀州之域春秋時屬晉左傳曰晉人謀去故絳欲
居郇瑕氏之地韓獻子曰郇瑕氏土薄水淺不如新田
遂遷新田注曰新田今平陽絳邑縣是也三卿滅晉其
地屬魏戰國時亦為魏地秦為河東郡地今州即漢河
東郡之臨汾縣地也魏止始八年分河東河北置平陽
郡又為平陽郡地後魏太武帝于今理西南二十里正

平縣界柏壁置東雍州及正平郡其地屬焉孝文帝廢
東雍州東魏靜帝復置周明帝武成二年改東雍州為
絳州隋大業三年廢州為絳郡初義師將西入關大將
軍進次古堆去絳郡十餘里通守陳叔達堅守不下高
祖命廚人曰明日早下絳城然後食乃引兵攻城自旦
及辰破之仍置絳郡武德元年罷郡置絳州總管三年
復為絳州

州境

東西三百六十五里
南北三百三里

八到

西南至上都五百九十里
東南至東都取垣縣王屋路四百八十里

東至澤州四百四十里
南至陝州二百里

西北至慈州二百四十里
東北至晉州一百四十里

貢賦

開元貢梨蠟防風
賦布麻

管縣九

正平 太平 萬泉 曲沃 翼城 聞喜

絳 稷山 龍門

正平縣

望郭下

本漢臨汾縣地屬河東郡隋開皇三年罷郡改屬絳州
十八年改臨汾縣為正平縣因正平故郡城為名也
汾水東北自曲沃縣界流入

澮水東自曲沃縣流入

柏壁在縣西南二十里後魏明帝元年于此置柏壁鎮
太武帝廢鎮置東雍州及正平郡周武帝于此改置絳
州建德六年又自此移絳州于今稷山縣西南二十里
玉壁按柏壁高二丈五尺周迴八里

晉虎祁宮在縣南六里左傳曰石言于晉魏榆師曠曰石不能言或憑焉抑又聞之作事不時怨譴動于人則有非言之物而言于是晉侯方築虎祁之宮今按宮南有澮水北有汾水俱西流至宮西而合隋末依宮餘址築堡今名修義堡

晉靈公臺在縣西北三十一里左傳曰晉靈公不君從臺上彈人觀其避丸即此臺也

武平故關在縣西三十里高齊時置周平齊廢

晉齊姜墓在縣南九里申生之母也

驪姬墓在縣南八里

太平縣

緊南至州五十里

本漢臨汾縣地屬河東郡後魏太武帝于今縣東北二十七里太平故關城置泰平縣屬平陽郡周改泰平為太平因關名隋開皇三年罷郡改屬晉州十年改屬絳州

汾水在縣東二十九里

太平故闕城在縣東北二十七里

白波壘在縣東南十二里後漢末黃巾賊于西河白波谷寇太原于此築壘

子奇壘在縣東三十里後秦王姚興遣弟義陽公平字子奇與征虜將軍狄伯支等步騎四萬伐魏攻平陽陷之遂據柴壁魏軍大至截汾水以守之平大敗將麾下三十騎赴汾水而死狄伯支等十將四萬人皆為魏所擒今按此壘西臨汾水壘側尚有柴村子奇投汾水即

此處也

趙盾祠在縣西南十八里

李牧祠在縣東北十三里

晉公孫杵臼程嬰墓並在縣南二十一里趙盾墓塋中

萬泉縣

上東北至州一百二十里

本漢汾陰縣地屬河東郡又薛通城者後魏道武帝天賜元年赫連勃勃僭號夏侵河外于時有縣人薛通率宗族千餘家西去漢汾陰縣城八十里築城自固因名

之武德三年于薛通故城置萬泉縣屬泰州縣東谷中有井泉百餘區因名萬泉貞觀十七年廢泰州縣屬絳

州

曲沃縣

緊西至州五十里

本晉舊都絳縣地也漢以為絳縣屬河東郡後漢加邑字屬郡不改晉改屬平陽郡後魏孝文帝于今縣東南十里置曲沃縣屬正平郡因晉曲沃為名隋開皇三年罷正平郡改屬絳州

絳山在縣南十三里出銅鉞

汾水西南去縣二十二里

澮水在縣南二里

絳水在縣東南三十里

漢絳縣本春秋晉都新田也在縣南二里周勃為絳侯
即其地也今號絳邑故城

陘庭故城在縣西北二十里左傳曰曲沃武公伐翼次
于陘庭是也

臺駘神祠在縣西三十六里左傳曰晉侯有疾卜臺駘
為祟問于子產子產曰昔金天氏有裔子曰昧為玄冥
師生允格臺駘能業其官帝用嘉之封諸汾川今晉主
汾而滅之由是觀之則臺駘汾神也

翼城縣

望西南至州一百里

本漢絳縣地屬河東郡後魏明帝置北絳縣隋開皇末
改為翼城縣屬絳州因縣東古翼城為名也武德元年
于此置澮州二年廢澮州縣屬絳州

澮高山在縣東南二十五里澮水出焉其山出鐵隋于此置平泉治

澮水今改名翼水

故翼城在縣東南十五里晉故絳都也

故唐城在縣西二十里堯裔子所封也

聞喜縣

望西北至州六十里

本漢左邑縣之桐鄉也武帝元鼎六年將幸緱氏至此聞南越破大喜因立聞喜縣屬河東郡後魏改屬正平

郡隋開皇三年罷郡屬絳州

景山在縣東南十八里

董澤一名董池陂在縣東北十四里左傳廚武子曰董澤之蒲可勝既乎

桐鄉故城漢聞喜縣也在縣西南八里俗以此城為伊尹放太甲于桐宮之所孔注尚書曰桐湯葬地也按今地有放太甲處在偃師縣界非此也又漢大司農朱邑屬其子葬桐鄉者又在今舒州界亦非此也

王官故城今名王城在縣南十五里左傳曰俘我王官

案此與虞鄉縣王官故城各引左傳證之雖異文而實一王官據此在聞喜縣南十五里則前所云在虞鄉縣南二里者其誤益明

祁奚墓在縣東二十二里今太原祁縣又有祁奚墓未詳孰是

絳縣上西北至州八十里

本漢聞喜縣地後魏孝文帝置南絳縣其地屬焉因縣北絳山為名也屬正平郡恭帝去南字直為絳縣隋開

皇三年罷郡改屬絳州義寧元年屬翼城郡武德元年屬澮州二年改屬絳州

備窮山在縣東北二十五里出鐵鉏穴五所

絳水一名沸泉水在縣北十四里出絳山東谷懸流奔壑一十許丈西北注于澮史記稱智伯率韓魏引晉水灌晉陽不沈者三版智伯曰吾始不知水之可以亡人國也乃今知之汾水可以灌安邑絳水可以灌晉陽

晉文公墓在縣東二十里左傳曰文公卒將殯于曲沃

出絳樞有聲如牛貞觀十一年詔致祭五十步禁樵蘇

稷山縣

緊東至州四十九里

本漢聞喜縣地屬河東郡後魏孝文帝于今縣東南三十里置高涼縣屬龍門郡隋開皇三年罷郡縣屬絳州十八年改為稷山縣因縣南稷山以為名也

稷山在縣南五十五里左傳曰晉侯理兵于稷以略狄土即此地也

汾水在縣南五十里

玉壁故城在縣南十二里後魏大統四年東道行臺王
思政表築玉壁城因自鎮之八年高歡寇玉壁思政有
備攻不克周初于此置玉壁總管武帝建德六年廢總
管城周迴八十里四面並臨深谷

稷祠在縣南五十里稷山上

義和墓在縣東北十七里

龍門縣 望東至州一百一十里

古耿國殷王祖乙所都晉獻公滅之以封趙夙秦置為

皮氏縣漢屬河東郡後魏太武帝改皮氏為龍門縣因龍門山為名屬北鄉郡隋開皇三年廢郡以縣屬絳州十六年割屬蒲州武德三年屬泰州貞觀十七年廢泰州縣隸絳州

汾水北去縣五里漢武帝行幸河東作秋風詞即此水也

故耿城在縣南十二里古耿國也

伏龍原在縣西南十八里

黃河北去縣二十五里即龍門口也禹貢曰浮于積石
至于龍門注曰龍門山在河東之西界大禹導河積石
疏決龍門即斯處也河口廣八十步巖際鐫迹遺功尚
存三秦記曰河津一名龍門水陸不通魚鼈之屬莫能
上江海大魚集龍門下數千不得上上則為龍故曰曝
鯁龍門水經注曰其魚出鞏縣鞏穴每三月則上渡龍
門得則為龍否則點額而還

裴廉故城在縣南七里

龍門關在縣西北二十二里

大禹祠在縣西二十五里龍門山上隋末摧毀貞觀九年奉敕更令修理

高祖神堯皇帝廟在禹廟南絕頂之上畫行幸儀衛之像蓋義寧初義旗至此也

元和郡縣志卷十四

欽定四庫全書

元和郡縣志卷十五

唐 李吉甫 撰

河東道 二

晉州 平陽望

開元戶六萬八百五十三 鄉一百四十八
元和戶六千五百六十七 鄉五十九

禹貢冀州之域即堯舜禹所都平陽也春秋時其地屬晉戰國時屬韓後韓將馮亭以上黨降趙又屬趙在秦為河東郡

地也今州即漢河東郡之平陽縣也永嘉之亂劉元海僭號稱漢建都于此前趙錄曰太史令宣于修之言于元海曰蒲子崎嶇非可久安平陽唐堯昔都願陛下都之于是遷都平陽後魏太武帝于此置東雍州孝明帝改為唐州尋又改為晉州因晉國以為名也高齊武城帝于此置行臺周武帝平齊置晉州總管義旗初建改為平陽郡武德元年罷郡置晉州三年為總管府四年為都督府貞觀六年廢府復為晉州

州境

東西三百二十四里
南北二百五十里

八到

西南至上都七百三十里
東南至東都六百二十四里

東至潞州三百九十里
東南至澤州四百一十里

西至慈州二百二十里
西北至隰州二百五十里

東北至汾州三百六十里
東北至沁州二百九十里

貢賦

開元貢
賦 蠟 燭
布 麻

管縣九

臨汾 襄陵 神山 岳陽 洪洞 霍邑

趙城 汾西 冀氏

臨汾縣

望郭下

本漢平陽縣屬河東郡在平水之陽故曰平陽魏置平陽郡平陽縣屬焉隋開皇元年改平陽縣為平河縣三年罷郡縣屬晉州其年又改平河縣為臨汾縣

平山一名壺口山今名姑射山在縣西八里平水出焉尚書曰壺口治梁及岐

潞水今名三交水東自襄陵縣界流入

堯廟在縣東八里汾水東

姑射神祠在縣北十三里姑射山東武德元年敕置
龍子祠在姑射山東平水之源其地茂林蓊鬱俯枕清
流實晉之勝境也

劉和墓在縣南三十五里和元海太子也

劉聰墓在縣西南十一里聰元海第四子也

襄陵縣

繫西北至州二十六里

本漢舊縣也屬河東郡高齊省周平齊自臨汾縣移禽
昌縣于今理屬晉州隋大業二年改禽昌為襄陵取漢

舊名也縣東南有晉襄公陵因以為名先是以禽昌名者後魏禽赫連昌以置縣故也

浮山在縣東南七里

滴水在縣北十五里

黑水經縣北二十五里

晉賈充墓在縣西南十里

神山縣

中西至州七十八里

本漢襄陵縣地也武德二年僕射裴寂奏分襄陵縣置

浮山縣屬晉州因山為名至三年因羊角山神人見又改為神山縣焉

黑山今名烏頭山在縣東四十四里黑水出焉

羊角山在縣東南三十一里

老君祠在縣東南二十里武德三年見神于羊角山下語曲沃縣人吉善行曰報大唐天子得聖理一千年其年敕遣通事舍人柳憲立祠因改縣為神山

岳陽縣

中西南至州一百五十里

本漢穀遠縣地後魏孝莊帝置安澤縣屬義寧郡隋開
皇十六年改屬沁州大業二年改為岳陽縣因山為名
義旗初建屬平陽郡武德元年罷郡改屬晉州

烏嶺山在縣東三十里

千畝原在縣北九十里周迴四十里

東池堡在縣南三十三里今堡中見貯義倉北面絕崖
三面各二丈五尺周迴二里

洪洞縣

望西南至州六十里

本漢楊縣即春秋時楊侯國也晉滅之以賜大夫羊舌肸漢以為縣屬河東郡魏置平陽郡楊縣屬焉隋開皇三年罷郡改屬晉州義旗初建改為洪洞縣因縣北故洪洞鎮為名也

霍山在縣東北三十里事具霍邑縣

汾水自趙城縣東流入

洪洞故城在縣北六里後魏鎮城也姚最序行記曰周建德五年從行討齊師次洪洞百雉相臨四周重複控

據要險城主張元靜率其所部肉袒軍門即此也

禽昌故縣在縣東南二十四里後魏太武帝禽赫連昌
置因以名焉

師曠祠在縣東南二十五里

霍邑縣

上南至州一百五十里

本漢彘縣也屬河東郡因彘水為名即周厲王所奔之
邑後漢順帝改為永安縣屬郡不改後魏初省及宣武
正始二年又置永安縣隋開皇十八年改為霍邑縣屬

晉州因霍山為名隋末喪亂武牙郎將宋老生屯兵于此義師之至也老生陳兵據險師不得進忽有白衣老父詣軍門曰霍山神遣語大唐皇帝若向霍邑當東南傍山取路我當助帝破之遣人視之果有微道高祖笑曰此神不欺趙襄子豈當負我耶于是進師去城十餘里老生戰敗劉弘基斬之遂平霍邑置霍山郡武德元年廢郡復置呂州縣屬焉貞觀十七年廢呂州縣又隸

晉州

霍山一名太岳在縣東三十里禹貢曰壺口雷首至于太岳鄭玄注曰今河東彘縣霍太山是也

呂坂在縣西南十里有呂鄉晉大夫呂甥之邑也呂州取名于此

汾水經縣西二里

彘水出霍山經縣南一里

普濟寺貞觀八年奉詔以破宋老生于此置寺

周厲王陵在縣東北二十五里

趙城縣

上南至州九十五里

本漢彘縣地即造父之邑也自漢迄晉不改

案後汾西縣志云後

漢改彘縣為永安縣此云自漢迄晉不改有脫誤

後魏太武帝廢趙城縣義旗

之初分霍邑縣置屬霍山郡因故趙城為名武德元年

廢郡置呂州縣屬焉貞觀十七年廢呂州縣屬晉州

汾水出縣西四里

霍山廟在縣東南三十里霍山上甚有靈驗貞觀五年

敕令修理

汾西縣

中西南至州一百八十里

本漢彘縣地屬河東郡後漢改彘縣為永安縣高齊又于此置臨汾郡及臨汾縣隋開皇三年改臨汾縣為汾西縣十六年改屬汾州十八年改屬呂州大業二年改屬晉州義旗初屬霍山郡武德元年又屬呂州貞觀十七年廢呂州又屬晉州

汾水在縣東三十五里

冀氏縣

中西至州一百九十二里

本漢猗氏縣地也屬上黨郡

猗音居義反

至晉省後魏莊帝

于猗氏城南置冀氏縣屬晉州

烏嶺山在縣西三十里

沁水在縣東一里

慈州 文城下

開元戶一萬一千二百七十五
元和戶一千八百七十七

鄉三十
案鄉數傳寫缺

禹貢冀州之域春秋時晉之屈邑獻公夷吾所居也左

傳曰驪姬賂外嬖梁五與東闕嬖五使言于公曰蒲與

二屈君之疆也不可無主乃使重耳居蒲夷吾居屈注
曰二屈今平陽郡北屈縣也左傳屈產之乘亦此地秦
兼天下縣屬河東郡漢北屈縣屬河東郡後魏孝文帝
于北屈縣南二十一里置定陽郡即今州理是也隋開
皇元年改定陽郡為文城郡貞觀八年改為慈州州內
有慈烏戍因以為名

州境

東西五百五十一里
南北二百一十二里

八到

西南至上都六百八十五里
東南至東都七百二十五里

東南至絳州太平縣一百九十里

東南至晉州二百四十里

東南至絳州二百四十里
而至龍門縣一百八十里

正西至黃河六十五里
西北至丹州一百八十里

北至隰州二百里

貢賦

開元貢賦

蠟布

白蜜麻

管縣五

吉昌 文城 昌寧 仵城 呂香

吉昌縣

中郭下

本漢北屈縣地也屬河東郡後魏孝文帝于今州置定陽郡并置定陽縣會有河西定陽胡人渡河居于此因以為名隋開皇十八年改定陽縣為吉昌縣貞觀八年改置慈州縣依舊屬焉

壺口山在縣西南五十里

風山在縣北三十里山上有穴如輪風氣蕭瑟未嘗暫止當其衝略不生草故以風為名

黃河北去縣六十里

姚襄城在縣西五十二里本姚襄所築其城西臨黃河
控帶龍門孟門之險周齊交爭之地齊後主武平二年
遣右丞相斛律明月左丞相平原王段孝先破周兵于
此城遂立碑以表其功其碑見存齊氏又于此城置鎮
隋開皇廢武德二年又置鎮九年廢城高二丈周迴五
里

文城縣

中東南至州六十五里

本漢北屈縣地屬河東郡後魏孝文帝于此置斤城縣

屬定陽郡隋開皇十六年改斤城縣為文城縣

孟門山俗名石槽在縣西南三十六里淮南子曰龍門未闢呂梁未鑿河出孟門之上名曰洪水大禹疏通謂之孟門水經注曰風山西四十里河水南出孟門與龍門相對即龍門之上口也實為黃河之巨扼今按河中
有山鑿中如槽東流懸注七十餘尺

文城故城在縣北三十里故老曰此城晉文公為公子時避驪姬之難從蒲奔狄因築此城人遂呼為文城

昌寧縣

中西北至州五十里

本漢臨汾縣地屬河東郡後魏太武帝分臨汾縣置太平縣孝文帝又分太平縣置昌寧縣屬定陽郡隋開皇元年改屬耿州十八年又屬汾州大業二年改汾州為文城郡縣仍隸焉貞觀八年改為慈州縣又屬焉兩乳山在縣西南七十里山有兩岫望如乳形因以為名

黃河北去縣七十九里

倚梯故城在縣西南一百五十里累石為之東北兩面
據嶺臨谷西南兩面俯眺黃河懸崖絕壁百餘尺其西
南角即龍門之上口也以城在高嶺非倚梯不得上因
以為名城中有禹廟後魏孝文帝西巡至此立碑碑今
見在

禹廟在縣西南一百五里龍門東岸上其碑是後魏孝
文帝所立

晉荀息墓在縣東北六十里

仵城縣

中下西南至州五十八里

本漢北屈縣地屬河東郡後魏于此置仵城郡領京軍
縣孝文帝改京軍縣為仵城縣隋開皇三年廢仵城郡
改屬文城郡皇朝改屬慈州

石門山在縣北六十里

拓定故城在縣西一里周保定四年置以高齊境因以
為名隋廢

呂香縣

中北至州一百二十里

本漢臨汾縣地也屬河東郡後魏太武帝于此置邢軍
縣屬仵城郡孝文帝改為平昌縣隋開皇十六年省平
昌入仵城縣義寧元年于此置平昌縣貞觀元年改為
呂香縣因舊呂香鎮為名屬慈州

馬頭山在縣南六十里其山峭嶷形如馬首因以為名
橫嶺山在縣西北六十里

隰州 大寧下

開元戶一萬八千五百八十三
元和戶二萬三千三百四十九

鄉四十八
鄉二十四

禹貢冀州之域春秋時為晉地七國屬魏秦為河東郡
地在漢為蒲子縣屬河東郡後魏初屬忸城郡孝文改
蒲子為長壽縣太和十二年于此置汾州周宣帝大象
元年于今州東百步置龍泉郡隋開皇五年改為隰州
大業三年又改為龍泉郡武德元年又為隰州爾雅曰
下濕曰隰以州帶泉泊下濕故以隰為名

州境

案州境里
數傳寫缺

八到

西南取慈州路至上都八百八十五里
東南至東都八百八十里

東南至晉州汾西縣一百六十里
東南至河中府六百里

南至河一百四十里
西至延州三百六十里

北至石州二百五十里
東北至汾州二百七十里

貢賦

開元貢

賦蠟

白蜜

麝香

胡女布

管縣六

隰川蒲

大寧

溫泉

永和

石樓

隰川縣

中郭下

本漢蒲子縣地也屬河東郡魏少帝分河東置平陽郡

蒲子縣屬焉劉元海僭號稱漢初理于蒲子後徙平陽
又于此置大昌郡以蒲子屬焉周宣帝改置長壽縣隋
開皇十八年改為隰川縣南有龍泉下濕因以為名屬
隰州

蒲水源出縣東北石樓山

黃櫨水出縣東北黃櫨谷

故橫城在縣南三十五里隋仁壽四年楊諒作逆遣偽
將吳子通屯兵築城于此橫絕蒲州道因以為名

蒲縣 中西北至州一百一十里

本漢蒲子縣地後魏于此置石城縣後廢周宣帝于石城故城置蒲子縣因漢蒲子縣為名也屬定陽郡隋開皇五年改屬隰州大業二年改為蒲縣

五禿山在縣東北五十里山少草木故名五禿周迴七十七里

常安原在縣西南四十里東西廣四十里南北長二十里

仵城故城在縣西南六十三里後魏仵城郡也

大寧縣

中東北至州八十六里

本漢北屈縣地也屬河東郡後魏于此置仵城縣尋廢
周武帝又于廢縣西三里置大寧縣屬南汾州隋大業
二年省武德二年于此置中州復置大寧縣以屬焉貞
觀元年廢中州以縣屬隰州

孔山在縣西北二十五里上有穴如車輪三所東西相
去名二丈其深不測因以名

黃河北去縣六十八里

蒲水一名斤水去縣六十步

浮圖鎮齊河清四年築隋移大寧縣理此即今縣理是也

溫泉縣 中西南至州一百六十里

本漢土軍縣地也後魏于土軍故縣東七十里置新城縣屬吐京郡太武改為嶺東縣孝文帝改為新城縣武德三年于縣東南四十里置北溫州及溫泉縣因縣南

溫泉為名貞觀元年省北溫州及新城縣以溫泉縣屬
隰州

遠望山一名可寒堆在縣西七十里高五里周迴七十
五里

西陽泉源出縣東北去縣十里

永和縣 中下東至州八十里

本漢狐讎之涉縣屬河東郡後漢省魏初復置狐讎縣

屬河東郡魏廢高齊後主于其城置永和鎮周宣帝廢

鎮置臨河郡及臨河縣屬汾州隋開皇五年改屬隰州
十八年改臨河為永和縣以縣西永和關為名也

樓山在縣西南二十二里

黃河東去縣六十里

孤譟故縣城在縣西南三十五里

石樓縣 中下東至州九十里

本漢土軍縣也屬西河郡晉省後魏孝文帝于此城置
吐京郡即漢土軍縣蓋胡俗音訛以軍為京也隋開皇


五年又以吐京屬隰州十八年改吐京為石樓縣因縣東石樓山為名也

石樓山在縣東南六十里水經注曰蒲水出石樓山

黃河東去縣九十九里

龍泉水出縣東南去縣十里山下牧馬多產名駒故得龍泉之號

縣理城漢土軍城也其城圓而不方故謂之團城



元和郡縣志卷十五